



**REPUBLIKA E SHQIPËRISË+ +**  
**ENTI RREGULLATOR I ENERGJISË**  
**BORDI**

**VENDIM**

**Nr. 298, Datë 30.12.2024**

**MBI**

**LËNIEN NË FUQI TË VENDIMEVE TË BORDIT TË ERE-S NR. 74, DATË 13.04.2022**  
**DHE NR. 72, DATË 15.04.2024**

Në mbështetje të neneve 16, 83 dhe 85 të ligjit nr. 43/2015, “Për sektorin e energjisë elektrike”, i ndryshuar; Vendimit të Këshillit të Ministrave (VKM) nr. 456, datë 29.06.2022 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”; neneve 15, dhe 22 të Rregullores për organizimin, funksionimin dhe procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016; si dhe “Metodologjisë së Përcaktimit të Çmimeve për Shitjen e Energjisë Elektrike me Pakicë tek Klientët Fundorë që Furnizohen nga Furnizuesi i Shërbimit Universal (FSHU)” miratuar me vendimin e bordit të ERE-s nr.189, datë 23.11.2017; Bordi i ERE-s në mbledhjen e tij të datës 30.12.2024, pasi shqyrtoi relacionin me nr. 2549/3 prot., datë 30.12.2024, të përgatitur nga Drejtoria e Tarifave dhe Çmimeve “Mbi lëniën në fuqi të vendimeve të bordit të ERE-s nr. 74, datë 13.04.2022 dhe nr. 72 datë 15.04.2024”,

**Konstatoi se:**

- Bordi i ERE-s, me Vendimin nr. 74, datë 13.04.2022, ka vendosur se çmimet e shitjes me pakicë të energjisë elektrike për periudhën 1 Maj – 31 Dhjetor 2022 mbeten ato të miratuara më herët me Vendimin nr. 252, datë 21.12.2021. Gjithashtu, klientët që kanë plotësuar kushtet ligjore dhe/ose teknike për daljen në tregun e liberalizuar të energjisë elektrike nuk i nënshtrohen dispozitave të pikës 1 të vendimit nr. 74/2022.
- Bordi i ERE-s, me vendimin nr. 366, datë 15.12.2023, vendosi të zgjasë fuqinë juridike të vendimit nr. 74, datë 13.04.2022, deri në miratimin e një vendimi të ri, bazuar në aplikimin e shoqërisë FSHU sh.a. për vitin 2024, për çmimet me pakicë për klientët fundorë të shërbyer nga Furnizuesi i Shërbimit Universal, në përputhje me legjislacionin në fuqi. Ndërsa, me vendimin nr. 72, datë 15.04.2024, bordi i ERE-s miratoi çmimet e shitjes së energjisë elektrike për klientët e kategorisë “Furra buke/prodhim mielli” të lidhur në nivelin e tensionit 0.4 kV.
- ERE i është drejtuar shoqërisë FSHU sh.a. me shkresën nr. 1660 prot., datë 19.07.2024, duke kërkuar dorëzimin e të dhënave mbi pasqyrat financiare operative për periudhën janar –

qershor 2024, si dhe pritshmëritë për realizimin e treguesve ekonomikë dhe financiarë për gjashtëmuajorin e dytë të vitit 2024. Në të njëjtën shkresë, ERE ka rikujtuar gjithashtu detyrimin për dorëzimin e pasqyrave financiare të audituara për vitet 2021, 2022 dhe 2023.

- FSHU sh.a., në përgjigje të shkresës së ERE-së nr. 1660 prot., datë 19.07.2024, ka dërguar shkresën nr. 4912/1 prot., datë 29.07.2024, e cila është protokolluar në ERE me nr. 1660/1 prot., datë 31.07.2024. Në këtë shkresë, FSHU sh.a. ka përcjellë pasqyrat e performancës për periudhën janar – qershor 2024 dhe parashikimet për vitin 2024, duke informuar se pasqyrat financiare të audituara për vitet 2021-2023 janë ende në proces dhe do të dorëzohen sapo të jenë përfunduar.
- Më pas, ERE, me shkresën nr. 1946 prot., datë 19.09.2024, i është drejtuar sërish FSHU sh.a., duke kërkuar informacion mbi parashikimet për treguesit ekonomikë dhe financiarë që pritet të realizohen për vitin 2025, si dhe parashikimin analitik të të ardhurave dhe shpenzimeve, të mbështetur mbi të dhënat historike. Gjithashtu, është kërkuar analiza e tregut të energjisë elektrike dhe trendet e zhvillimit të kësaj industrie, informacion mbi numrin e klientëve të furnizuar në kushtet e mundësisë së fundit për periudhën janar – gusht 2024 dhe për pjesën e mbetur të vitit, si dhe bilancin energjetik me evidencë të sasisë së energjisë së shitur ndaj klientëve, të ndarë nga FSHU sh.a.
- Në përgjigje të shkresës së sipërcituar, FSHU sh.a., me korrespondencën nr. 6054/1 prot., datë 30.09.2024 (protokolluar në ERE me nr. 1946/1 datë 04.10.2024), ka përcjellë llogaritjen e performancës financiare për periudhën janar – gusht 2024 dhe parashikimin për vitin 2024. Gjithashtu, ka raportuar mbi numrin e klientëve të furnizuar në kushtet e mundësisë së fundit gjatë kësaj periudhe, koston e blerjes së energjisë për tetëmuajorin e vitit 2024 dhe parashikimin për të gjithë vitin për klientët tariforë në nivelin e tensionit 0.4 kV dhe klientët në kushtet e mundësisë së fundit. FSHU sh.a. ka deklaruar se planifikimi i treguesve për vitin 2025 do të dërgohet sapo të jetë gati, por deri më tani nuk ka informacion shtesë. Po ashtu, është dorëzuar lista e çmimeve të përdorura për çdo kategori të klientëve të furnizuar, si në kushtet e shërbimit universal ashtu edhe në kushtet e mundësisë së fundit (në 35 kV dhe 20/10/6 kV), si dhe parashikimi i sasisë së energjisë elektrike të furnizuar për periudhën janar – gusht 2024 dhe për periudhën shtator – dhjetor 2024.
- Planifikimi i treguesve tekniko-financiarë për vitin 2025 është ende në proces. Parashikimet financiare për aktivitetin e shërbimit universal dhe furnizuesin e mundësisë së fundit do të dërgohen sapo të përfundojnë.
- ERE, me shkresën nr. 2394 prot., datë 13.11.2024, bazuar në VKM nr. 456/2022, të ndryshuar, dhe në kuadër të vlerësimit të mjaftueshmërisë së të ardhurave të Furnizuesit të Shërbimit Universal, i ka kërkuar shoqërisë KESH sh.a. të informojë mbi çmimin e parashikuar të shitjes së energjisë elektrike për FSHU sh.a. për vitin 2025, si dhe mbi vendimmarrjen përkatëse të Asamblesë së Aksionerëve. Deri më tani, nuk është marrë asnjë përgjigje nga KESH sh.a.
- FSHU sh.a., me shkresën nr. 7387 prot., datë 03.12.2024 (protokolluar në ERE me nr. 2549 prot., datë 16.12.2024), ka kërkuar hapjen e procedurës për rishikimin e çmimit të shitjes së energjisë elektrike për vitin 2025. Në përgjigje, ERE, me shkresën nr. 2549/1 prot., datë

17.12.2024, i sqaroi shoqërisë FSHU sh.a. se, për të vlerësuar çmimin e energjisë për vitin 2025, është e nevojshme depozitimi i dokumentacionit të kërkuar më herët nga ERE me shkresën nr. 1946, datë 19.09.2024, sipas kërkesave të legjislacionit në fuqi.

- Në vijim, FSHU sh.a., me shkresën nr. 7387/2 prot., datë 24.12.2024 (protokolluar në ERE me nr. 2549/2 prot., datë 26.12.2024), dërgoi një vlerësim të performancës për periudhën janar – nëntor 2024, së bashku me parashikimet për vitin 2025.
- Me korrespondencën e sipërcituar, FSHU sh.a. shton gjithashtu: “... Duke pasur parasysh që ende nuk kemi një vlerësim përfundimtar të çmimit të shitjes që do të aplikohet nga KESH sh.a. për vitin e ardhshëm 2025, kërkojmë që edhe për muajin janar 2025 të mos bëhet rivlerësimi i kostove në përcaktimin e çmimit të shitjes me pakicë për klientët e shërbimit universal.”
- Referuar të dhënave financiare për periudhën janar-nëntor 2024, të raportuara në korrespondencën përkatëse, rezulton se të ardhurat nga shitja e energjisë për klientët e shërbimit universal kanë mbuluar kostot e aktivitetit të FSHU sh.a., duke garantuar një funksionim normal operacional. Shoqëria ka bërë të ditur se deri më tani nuk ka marrë nga KESH sh.a. të dhëna mbi çmimin me të cilin kjo e fundit do të tregtojë energjinë për vitin 2025, siç kërkohet nga VKM nr. 456/2022, i ndryshuar. Sipas kësaj VKM-je, KESH sh.a., si shoqëri publike me detyrim shërbimi publik, është e ngarkuar të furnizojë FSHU sh.a. me të gjithë sasinë e nevojshme për klientët e shërbimit universal. ERE, me shkresën nr. 2394 prot., datë 13.11.2024, kërkoi nga KESH sh.a. informacion mbi çmimin e parashikuar për vitin 2025 për mbulimin e kërkesës së FSHU sh.a. Deri më sot, KESH sh.a. nuk ka dorëzuar informacion mbi këtë çështje.
- Duke pasur parasysh sa më sipër dhe rrethanat në të cilat FSHU sh.a. ende nuk është në gjendje të parashikojë kostot e blerjes së energjisë për vitin 2025 për të mbuluar kërkesën e klientëve që furnizohen në kushtet e shërbimit universal, konsiderojmë të domosdoshme:
  - Zgjatjen e fuqisë juridike të vendimit të bordit të ERE nr. 74/2022 deri më 31.01.2025, ose deri në paraqitjen nga FSHU sh.a. të kërkesës për rivlerësimin e kostove që përcaktojnë çmimin e shitjes me pakicë për klientët e shërbimit universal.
  - Zgjatjen e fuqisë juridike të vendimit të bordit të ERE nr. 72/2024 deri më 31.01.2025, ose deri në paraqitjen nga FSHU sh.a. të kërkesës për rivlerësimin e kostove që përcaktojnë çmimet e shitjes së energjisë elektrike për klientët e kategorisë “Furra buke/prodhim mielli” të lidhur në nivelin e tensionit 0.4 kV.

Për gjithë sa më sipër, bordi i ERE-s,

### **Vendosi:**

1. Të zgjatet fuqia juridike e vendimit të bordit të ERE-s nr. 74, datë 13.04.2022, deri më 31.01.2025, për çmimet me pakicë të energjisë elektrike për klientët fundorë që shërbehen nga Furnizuesi i Shërbimit Universal.

2. Të zgjatet fuqia juridike e vendimit nr. 72, datë 15.04.2024, deri më 31.01.2025, për çmimet e shitjes së energjisë elektrike për klientët e kategorisë “Furra buke/prodhim mielli” të lidhur në nivelin e tensionit 0.4 kV.
3. Në rast se do të rezultojnë efekte mbi ose nën të ardhurat e lejuara, korrigjimi dhe kompensimi përkatës do të kryhet në përputhje me përcaktimet e nenit 20, germa “c” të Ligjit nr. 43/2015, “Për sektorin e energjisë elektrike”, të ndryshuar, si dhe metodologjive përkatëse të miratuara nga ERE.
4. Drejtoria e Tarifave dhe Çmimeve, të njoftojë shoqërinë FSHU sh.a. dhe palët e interesit për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI**

**Petrit AHMETI**